

道場文

釋道踪

李相國集

十三

東國李相國全集卷第三十八

道場齋醮疏祭文

東京招討兵馬所製

奉恩寺告 太祖真前文

云云 聖祖龍興肇集自天之命醜邦蟄結妄
懷撼樹之心伏念臣等素乏軍籌謬司戎律非
以葢然之品所可易勝敢祈赫爾之靈曲加默
相致令軍容益盛士氣增揚鼓而敢前順風直
驅於旗尾兵之所指逆魂先落於劍頭云云

臨津沙平通行龍王祭文

云云神得水居妙用不常於顯昧道由津濟大

兵可卜於東西方戎陣之啓行展祥禱而足矣
仰惟靈應曲借冥扶收風浪之震驚利有攸往
得橋梁之平易無所不通云云

天皇醮禮文

云云有所感則通是曰天尊之妙道不得已而
用實惟王者之義兵嗟彼陪京蠢然頑俗如虎
而翼寢成擇肉之貪盛血于囊漸作射天之計
然我克寬之后不欲輕用其刑尚稽大辟之加
只示溫言之諭祇益愆罪略不思悛故命將以
是懲豈佳兵之所致今者日輪見恠星度失行

未知天意之何如尋仰靈麻而斯籲致令災萌
遄息賊氣自摧如李晟之東屯功能存社若馬
豐之西伐師不延時尋馳露布之書坐致大安
之慶云云

黃池院法華會文

云云甘蔗氏之大慈宏機現化妙蓮經之正法
趣實自權顧因違命之民謬管興師之律恐彼
帶根之漸固雖有是行如令玉石以俱焚本非
吾意庶仗仁麻之善護坐看賊種之自消茲啟
熏筵載揚寶典伏願先聲纔及舊染唯斯肉袒

素車乞降於麾下壺漿箪食爭犒於軍前云云

黃池院龍王祭文

惟神宅于深淵有是玄德飛潛無常變化莫測
人有所禱胡求不得今我受命出征逆賊旗尾
東指將踐其域庶幾至靈借以猛力俾我軍師
不日獻馘豈唯吾儕克有成績龍亦有功永食
于國至誠可歆侑此洞酌

浮石寺丈六前願文

云云今者東京逆類猖狂跋扈結根寢固日益
滋蔓國家尚不忍加誅再降溫言喻以禍福猶

頑然罔有悛心益肆吞噬致有今日問罪之師
是自招也又誰咎哉然我君之本意不欲多
傷人物苟其民悔過請罪咸與惟新則皆赦勿
誅使復齒平民其好生惡殺如此若賴佛力神
通之助兵不血刃受降獻捷奏凱班師則非唯
我君之意亦如來愛衆生之本願也今遣某官
獻淨衣一領用表微誠耳伏惟云云

太一醮禮文

違命則征本司馬九伐之法主兵所在惟太一
十真之威昔新羅之向衰困百濟之肆虐方旣

氏之銳卒逼以重圍微 太祖之救兵幾無噍
類及舉國而內屬亦受賜之不貲夫何獷俗之
無知忘我先王之大德一受人飯而有不負其
恩者可爲國民而其若是之甚乎謂天誅之可
逋陷塗迷而不復罪難可赦神亦豈容當師律
之是陳冀威靈之丕佑寔嚴信薦仰扣冲聞伏
願白刃一揮見巨鯨之就戮長弧所射無孽狐
之敢逃云云

基州

太祖真前祭文

云云於穆 太祖聰明神聖鎮星表祥有文在

鏡龍興鵠嶺寔天所命新羅慕義納款自鄉嘉
彼來降置州曰慶何其子孫忘我先恩橫行叛
逆鼓動禍門罪不容忍出我三軍非我聖祖
其孰予援基州古縣遺像宛存遣以寮佐敢薦
蘋蘩惟冀冲靈諒我敦敦剪滅元惡無使滋繁
俾我社稷萬世彌尊非特天祿在于後昆先
王血食永永惟臙

祭一善津龍王文

云云在天在淵莫測飛潛之變採澗採沼敢陳
蠲潔之禋惟冀幽靈曲加陰相致令陟長橋之

虹跨蹈險如夷得脩路之砥平有通無礙云云

智異山大王前願文 副使已下行

某等俱以非才補元戎之寮佐將問罪東都夫
軍之生死成敗皆係于統軍譬諸人身統軍如
首寮佐如手臂軍卒如足安有首之有恙而手
臂足之安然哉今師次于善州統軍尚書金公
某忽有微疾節宣頗爽意者山行野宿觸風犯
霧之病耶或不知有異故而然耶一軍憂恐莫
知其由敢發衆誠虔禱于我大王之靈若借以
神力保持救護俾金公勿藥有喜立復康和則

非唯三軍之福也大王之威靈益顯豈不佳哉
先以衣櫬一事姑伸微懇迨病瘳續遣使致祭
報恩之萬一者

更行尚州離營祭文

云云反躬自悔則能保其躬有罪不謝則祇益
厥罪追記離州之曩日竊思徼福於諸神已具
小牢將陳血祀何宰人之不謹在中路而見攘
靈威密助之使然盜雖自露軍令不嚴之所致
予亦敢安既懲其人又責于已申備刑生之冀
遙伸如在之誠惟冀正聰僉加歆飲致令病瘳

賴息災兆不生指麾虎步之師蕩掃蜂屯之賊
云云

天皇前別醮文

云云將以伐下國雖云舉義之王師如欲得天
時敢不徵福於上帝徵前史之遺記考東京之
厥初方 太祖受命而勃興有金傳納土而自
附是豈攻城而後取良由慕義之所然嘉乃忠
誠冊厥君於尚父之位存其舊國崇茲号以留
守之司何後世之民忘前代之好非特亂紀逆
常之已甚抑其殘民害物者滋多拒我上都雖

無異蟾蜍之怒臂原其虐迹不奈如豺虎之流
涎故聲其罪以將征非實我君之本意人所
怒也天其忍諸聊陳洞酌之儀仰乞至靈之助
冀歆明信遄降顯威大兵所臨若礮投卵群賊
自熄如火燎毛云云

祭公山大王文

云云一女一男謀安其身殽肩稻飯尚克事神
誠苟有至受福綦綦况我一人以南面貴事神
孔勤情禮悉備凡曰名山皆有常祀豈其有求
然後始事嗟爾頑民磨牙吮血斬刈人物流播

恭龔

腥蠃驅擾平民鹿駭蹶蹶所經城邑無不陷沒
焚殘聚落比屋灰滅罪固盈貫理當徃伐是故
受命龔行天罰聞我公山四方所仰享國血食
其來者尚國之於神既恃有素有事即禱於禮
不阻神亦於國受祀繇古倉卒有難胡忍不救
茲將薄薦敦遣信使以不肖故設奠助予國不
可負其終弃歟云云

開泰寺

祖前願文

云云臣等聞昔甄萱以強兵勁卒大伐新羅其
鋒不可與敵我聖祖以一萬兵救之其兵却

退不然新羅之民孑然無種矣然則其父兄子弟妻妾之得全首領蔓葉繁支以至今日誠我聖之力也今其子孫辜負先王之德擅興兵刃叛逆官家是背恩弃義不忠不孝之人也其在先祖之慮得不敷聞上帝導降雷霆之怒而忍令此屬敢搖我聖祖草創之邦業耶伏望借以神力俾臣等擒滅逆類不日効捷復築我邦家太平之基則班師之日當以某事報稱者云云

正旦行天皇醮禮文

云云福物之至屬歲月日之元兵家所先得天
地人之助伏念某等恭承嚴命出討頑民彼所
行罪惡之原宜不保復更之命夫何偷幸尚爾
逋誅閱歲律之已周雖慙無効及年華之纔動
庶克有成益罄丹悰仰塵玄鑑敢覲無私之道
默迴助順之威致令順斗柄之指寅東摧賊壘
向宸居之負坎北奏捷書云云

山海神合屈祭文

云云不誼之人天地所弃也至誠之薦山川其
捨諸爰有下都敢成元計諭集幸災之遺盜擅

侵無罪之小城謂也緣此爲階至今作梗茲欲
加於天討垂已即於戰場主獄主河若有神之
靈者同心同體宜借力以扶之寔舉明禋行承
陰相致令秋毫不犯東降吠主之徒春雪未消
北首朝天之路云云

太一醮禮文

三軍都行

云云名非常名神則與道同體義伐不義天其
以手借人某等各揔兵機甫臨賊境利在速戰
雖知振旅以遄征死不復生猶恐無辜之同斃
故執剛柔之柄徐觀逆順之機夫何無識之徒

終未體予之意復從草竊之盜自速巢焚之災
彼計墮茲是我幸也不以此時而得制其於後
悔也曷追追此下情聒于冲聽惟冀高高之鑒
端加赫赫之威致令誅滅頑凶致首梟而正律
撫循父老解面縛而受降云云

蔚州戒邊城天神祭文

云云邈千年之古郡有罪然之孤堵惟靈神兮
鎮壓行人不敢唾路本從天以降精豈瀆鬼山
英之是偶紛士女之祈求朝而告兮夕以報况
國難之方興豈安然而不救吁彼東都之逆寇

犬猶信兮吠主將振旅以徂征望至神之陰助
遣信使兮駿奔孰憚道途之艱阻苟精誠之上
格應必疾於拊鼓使天兵兮有聲使賊徒兮如
掃方海首兮未綠奏凱歌兮盈道功必歸於我
神國之報兮傾圉罄府茲一酌兮雖薄庶歆信
而不歆其臭云云

北元山祭文

云云愚等非禦捍之才受將帥之寄鑿凶門而
出統義兵而至捐生赴戰凡為國耳神食茲土
亦國之賜義等吾儕職當振救宜與三軍應響

奔赴其於旗尾所指馬足所邇一進一退一行
一步神具趨追是衛是護俾掃頑民旋馳露布
方茲未渚先以此告神之聽之副我微懇云云

慶州東西兩岳祭文

云云鳴戲以國不幸逆賊崛起然非特國之不
幸亦神之恥非唯恥爾神之不幸亦至矣何者
國以我神威靈可倚故崇以大王之號饗以春
秋之祀所冀者鎮衛國家靡惡興利如是而已
耳脫上國有不利四方將有事神威听及無有
遠邇宜以陰靈遏絕禍始何況雞林之舊邦實

大王所食之地孽徒肆虐聚黨如蟻亂紀逆常
違命弃義神若有靈理宜枕止夫何不然使至
於此嗟乎 國家平昔事神之功大王所以鎮
國之意安所置耶若爾而神不恥歟設使其民
偷延年紀馨其黍稷豐厥牲鬻勤事大王無所
不備以我大王之正直當不享不義之祀况其
罪惡天地所弃宜當斬戮之誅寧保領吏之齒
若一旦邑滅人亡祠宇荒圯則大王獨何憑而
有恃國亦以大王有何功力而割玉帛之枉費
耶彼此之祀羈遊無寄是所謂神之不幸也爲

大王之計者孰若俾我官軍擒滅渠師餘悉原
之驅于耒耜使煙火不絕與昔無異則大王血
食永永無既豈不喜哉神其諒之副予所冀

祭蘇杭方將軍文

云云夫外國之不賓中國久矣太宗將臣伏萬
國混一文軌使將軍統師侵軼我高麗將軍不
幸駐騎于我國便未西轅故有遺祠在茲且
外國不賓常理也文皇帝猶憤然怒作使勞師
遠役迺至自將而經略是將軍所識也况東京
者是我國之陪邑也敢舉兵叛國呀喙吠主焉

狗畜所尚不爲未識將軍之意其視何如也伏
望酌今古所以伐下國輕重之宜奮將軍昔日
虎步鷹騰之威俾官軍汎掃醜俗不日班師則
將軍雖以客魂得食於此無愧矣

獻馬公山大王文

云云惟神毓秀鍾靈擁衆山而作衛乘雲馭氣
想帝所之朝真某等久握兵符未成捷効須借
大王之神力堪擒兩地之賊魁輟此蘭筋獻于
藻宇名雖爲之賤畜精則應於列星仰異冲靈
俯垂優納致令指麾戰卒更鞭奔逸之雄銜勒

元凶能制強梁之力云云

疾疫祈禳般若法席文

云云三千界之慈悲父無如我釋尊十二部之殊勝經斯謂之般若宣揚苟切饒潤滋多顧吾軍皆効於從征何一士不思其努力禍生所忽病貧能興凡司統領之權宜急鎮禳之術張皇梵采召集名縉特於軍壘之四隅閱此真詮於七日一毫所締圓鑑即通伏願化謳歌於呻吟勿藥有喜策疲駑為趨捷所向無前盡覆賊巢遄還京輦云云

七鬼五溫神醮禮文

云云注病重輕惟帝所命酌人善惡迺神之權
敢公機勢之可矜仰覬正聰之斯諒赴予戰壘
孰匪勇夫皆從王事而勤勞固合天心之保護
何嬰沉頓莫効奔馳且一士容失其朝餐猶欲
輟甘而相恤况大疫多行於軍伍其能安坐而
忍觀茲展信羞寔申精禱庶令凡百從役無一
告疲釋去宿疴猶陰雲之廓卷洗清汙俗若春
雪之旋消云云

太祖前別祭文

云云人墮阨窮必呼父母惟我有邦實 聖祖
所構既搏其初寧忘厥後于今不幸遭此逆寇
嗣孫之憂迺 聖祖之夜 我聖在天忍不是
救如其不然國非我有先王血祀能復存否毋
謂臣微假臣以手臣若滅賊於國不負生死存
亡惟命是受云云

天皇別醺文

云云天得一以清默幹真樞之不測戰有五可
勝亦復陰助以迺成敢陳懇倒之誠再瀆高明
之鑑有頑賊類久違天誅成言欲降而實抱詐

謀外示以弱而內蓄銳氣奈軍師之追迹曠歲
月以無功徇國忘軀萬人之勞憊尚丁轉資餉
口一日之糜費幾何顧未雪其憤情輒復聲其
哀叫冀歆明信遙借真麻致令筭無遺籌役勿
再舉坐降群賊示善戰不陣之威旋畫歸期無
曷月予還之歎云云

東京西岳祭文

云云昨者東京元惡義庇之受戮實亦大王之
賜也何者賊之逃遁非無他所然義庇入匿西
岳為我所擒是豈大王之使然耶予昔剖竹東

都嘗事大王及捕孝心之黨又嘗受大王之賜
今復統軍自受命離家之日心語口曰西岳大
王顯有靈德况復有舊於予是行也必蒙大賜
克成元功及入東都躬造祠堂以祈陰助果承
力援獲此元凶嗚呼大王之於予可謂不負矣
敢遣信使肅展精禋是薄禮也不足容歆若復
放神通之力使草賊巨魁勃仇受誅於我軍則
當以琴瑟鍾鼓歌舞倡優之樂以報洪恩言不
可食神其鑒之云云

東岳祭文

云云人與人相知恃舊相歡則其所蘊蓄無不
顯陳神明之分亦不遠人如其有素寧視如新
曩者予以無似剖符茲土常事兩岳大王其所
賴固不貲矣及捕孝心之黨予又從軍累更歲
月亦受大王之賜獲全首領以至今日皆大王
之力也然則大王之於予不可謂之無素矣今
者逆賊蜂起叛逆王命國家不能容忍命愚
等討之自入都之日親即祠宇卑露深衷仰蒙
陰援西岳大王果顯威靈諭致東京元惡義庇
於祠下使我軍獲之其不負如此豈不嘉哉獨

我大王嗇威吝德不以赫然靈迹報宿昔之歡
私心不能無望然東京元惡則以義庇為最尊
賊之巨者無有如勃佐者今義庇雖死勃佐猶
在若大王速顯靈威使勃佐及其支黨就我麾
下面受誅戮則是日也予當大統軍師親謝祠
前以琴瑟鍾鼓倡優之伎樂我大王大王其不
享歟云云

戒邊大神謝祭文

夫人之一行一步非有神明之衛猶恐顛蹶况
兵有不測之變戰為必死之地其成其敗皆冥

然所使孰有恃衆違神而能得其利者耶愚等
自興師之日聞我天神鎮此一方不遠千里躬
叩祠堂一申微素覬荷恩光果靈應之不遑致
賊魁之梟首禮當叙謝恩不可負今者仲秋初
吉時節淒清籩豆斯設鍾鼓斯鳴是之不享予
面有頽云云

戒邊天神前復祭文

云云爲天所命鎮百里之雄州與國同憂掃一
方之劇賊某等過承明勅出討頑民亮非人力
之足憑須借陰功之不測故披丹府再叩玄關

曾於夏初義庇勃佐頭落於劍下未及歲抄山
角得光尾搖於甯中傾巢穴以蕩焚致方州之
靜謐皆所使也吾何有焉既受賜之不貲其在
禮也宜謝恭尋皎誓聊薦菲儀惟冀正聰俯歆
懇素云云

東西兩岳合祭文

云云氣鍾萬粹擁衆嶽以鎮臨威定一方合群
心之傾嚮某等伏我大王之陰助討茲一境之
頑民禱西岳之方勤未幾因義庇於祠宇惡東
山之不報俄而致勃佐於我軍連獲賊魁豈非

神賜禮則宜於當謝盟固難於敢渝茲取良辰
侔陳薄薦既有功而受享雖伐德而無嫌云云

正旦行天皇醮禮文

云云天何言哉行四時而不忒歲之元也合萬
福之來臻伏念某等久統軍師謾延時月山栖
野宿誠一日之猶難陽長陰消况三年之又及
雖賊魁之僅滅顧餘種之未殲庶迓首春盡擒
支種仰覲高明之鑒垂歆哀切之誠致令與物
惟新掃汚俗之舊染迨冰未泮奏凱樂而言旋
云云

公山大王謝祭文

云云今月某日賊魁等克就擒獲授首于我軍
是日也幕府寮佐輩槌牛擔酒大設公宴將以
賀我也於是自偏將至于士卒桓桓赳赳熊步
虎視卓紅旌豎白刃鳴鍾撾鼓吹笙鼓瑟申以
百戲之伎鋪列軍門序立旅進將以樂我也予
憮然遏止之曰若等以賊滅歸功於我耶此則
公山大王所以爲國家辨列于皇天上帝假手
於官軍使然也予豈敢貪天之功攘神之力奪
三軍之勞自尸大義首享茲樂耶遂麾而却之

曰乃等先以牲幣黍稷之奠陳樂府軍容悉如
今日所排比者用樂我大王還以享予則予亦
快意受若之宴勞不辭也於是寮屬等逡巡而
退先齋三日藏此典祀以報我然後遣以心腹
之使致敬祭于大王之靈大王忍不享茲誠耶
云云

東國李相國全集卷第三十八

東國李相國全集卷第三十九

佛道疏

翰林修製

佛頂道場疏

云云世雄希現優鉢華之開敷法藏最尊摩尼
寶之照耀眷惟眖質叨襲丕基安定厥邦顧之
恭明之德歸依於佛佇蒙覆護之慈消選良辰
灑清梵宇峙方壇之四角祇展香科披戒服之
七條競揚秘句耳纔經玉音之妙頂若受金手
之摩伏願甘露普霑真風遠暢如山益固享祚
業之靈長置器不危擁國家之帖泰

國卜北斗延命度厄道場文

玉毫現相瑠舌吐言為一劫人暢真功於六甲
是東方佛譚勝力於七元苟罄歸崇尋蒙度解
顧惟孱弱叨據重艱陰蕩陽摩當八節四時之
會晨兢夕惕考五占三兆之同宜慎必於初冬
必依授於妙蔭肆於淨宇敬此熏筵招迎大展
之戒沉宣振旁行之密藏伏願憑覺寐之覆露
荷靈府之保維身其康強永享無疆之膺服民
用和穆誕延有截之寰區

西京興福寺講華嚴文

等慈妙覺顯億化於十方滿字圓音融萬殊於一味炤高山之是喻盡大地以難量言念前寧篤崇內教迺春東明之古國立此精藍寔弘西竺之遺風資諸梵福顧先願之有至豈後嗣之敢輕茲遣使輶倅開熏席恭迎毳衲披屈眊於猊床仰對玉毫演貝多之虬藏精修允集妙鑒必通伏願慧日旁輝法雲廣被邊陲靜謐永無雞檄之飛宗社安榮寢享龍圖之久

同京重興寺說金經文

長身現相圓萬德之莊嚴廣舌吐音極一乘之

微密梵王讚雲蓋之遍耀信相從金鼓以得聞
眷惟耿耿之資風續丕丕之緒御茲神器若涉
千春永仰止覺天行資於甘露消令辰於羽籥
騁膚使於翼京祇扣奈園宛張檀席瞻依睟相
營勝采於六時剖析雄詮演真源於二妙誠之
所至感乃必通伏願借以慈庥暢為和氣永綜
稔而穀價如土兵戈戢而虎庫生塵

同京興國寺諸魂利往說金經文

六道群生著苦輪於業幻三身大覺冲義駕於
經王眷慈留鑰之都自昔尋戈之地想多覆沒

猶有冤銜莫非土莫非臣斯未忘於一日自歸
佛自歸法庶追賁於九原爰遣朝紳往投寶剎
集三千儀之淨侶講破靈編仰八十種之慈容
虔陳妙供伏願諸魂等永除封執高蹈真常速
拋熱惱之區有如脫屣徑躡清涼之境其若還
家

同京重興寺佛像點眼文

等空絕想一真體之自如對境起因億化身之
皆現敢憑像誕誕發信心眷我先王卜茲勝地
開阿蘭若之寬敞立窣堵波之巍峩曩經回祿

之災盡為煨燼旋命般倖之手中備矣輪顧曠
日歷年以方興何卒雷暴電之大震天機莫測
雖稽慶帝之張皇梵相猶存宜歸熏科而崇奉
寔傾霞翹虞點運眸伏願覺蔭遄加慈冷旁潤
增延曆數啟基永孚于休燕及生靈無物不得
其所

鎮江寺五佛齋文

清淨真身應多天之共讚神通妙力迴大地以
非難逝彼鴨江介于鴈塞役萬人而堤築奠禦
橫流授五佛之慈悲庶資博濟方臨春序爰遣

使華修雲供之熏科禮金臺之睟相伏願他心
洞鑒慧援周施鎮壓狂瀾拓我疆於有截懷柔
遠域播王化於無垠

西普通寺行別例談禪文

心法西來傳一窠之佛印頓門東峙分萬派於
祖源苟無數於談揚即有資於福利春惟涼德
早迫樂誰職此重艱乘國風之澆薄稽于術數
遇法筭之奇屯加又星躔多變於上天水戶適
衝於大歲將何修歸弭厥災危且憑覺蔭之清
涼極演宗乘之微密茲授禪宇特啟道場洋乎

李杜集卷之四
抗舌之言契彼鏡空之照伏願端承保護丕擁
吉祥和氣致祥亡政叶璣衡之正生民樂業四
方無鼙鼓之鳴

穆親殿行災變祈禳華嚴法席文

一音妙說無非微密之法門三譯靈編獨極圓
融之性海譚揚苟篤饒潤叵涯伏念弟子謬以
眇冲託茲艱大念祖功之積累用敷遺後人休
履天位以凌兢無遑曰今日樂然政刑解弛而
不能振起抑風俗墮壞而尚未維持積此陵夷
居常惕懼况閔術家之諗不無天數之屯加又

察諸地理則可虞水戶之災觀乎天文則屢見
星官之譴若茲變異何以祓禳宜營最勝之緣
仰丐大悲之援斯消良日特掃內闈招迎鷲嶺
之真流敷演虬宮之聖典願輪方轉覺鑒已通
伏願遄沐慈庥誕膺純嘏六氣不忒陰陽和風
雨時四方咸寧弓矢韜干戈戢

宮主封冊祈恩麗正宮行般若道場文
風形四方關雎是后妃之化理極十地般若為
佛法之宗念膺正宇之臨將定中閨之位
在禮為重必開嘉會以侑儀畢事無虞須扣妙門而

乞援茲集三千儀之緇侶俾揚十六會之靈詮
勝事甫周他心即照伏願懿名克正適宮掖以
騰歡陰教所加旦霽區而蒙福

藥師殿行香文

界若瑠瑤之靜有大醫王光踰日月之明照諸
刹土自于先格妥我尊容罄陳供養之儀來者
尚矣仰賴慈悲之蔭利其博哉茲率貽謀寔嚴
妙範辨熏熏之信饌燒種種之名香庶伏勝因
尋蒙善護緝熙于嘏茂延胡考之期安宅一歆邦
永保盈成之業

北弘景院行鎮兵金經藥師道場文

金鼓所揚是信相親聞之極唱緣囊斯秘惟藥
師本願之雄詮尊閣苟勤保持無怠念眇然之
質臨蠹爾之民政如膠柱以調琴固知其變國
若抱薪而置火幾至于危況今回祿興祲而倉
庾斯焚玄冥或候而電雷猶震未識若茲之變
終為何等之災宜託妙門第資梵蔭斯集毳衣
之真侶俾繙貝葉之微言仰冀慈悲曲垂保護
輜兵不用永無奸宄之竊窺比屋可封寢致生
靈之丕變

第貳
第

天變祈禳五星道場文

天出異以示人蓋將曉喻佛隨機而說法庸可
議思歸誠有加消患未朕伏念承祖先之慶擁
廟社之權位無安事無輕雖勤勵翼德不綏明
不燭動有闕遺由紀綱風俗之搶攘召寒燠雨
暘之乖僭此猶滋甚嘗未遑寧夫何木曜之失
行迺與火星而同舍益深憂畏功計禳禳宜憑
最勝之門端借大慈之蔭茲以淨範式啟熏筵
邀迎滕祐之高流宣暢貝文之靈典絲毫營締
影響感通伏願災沴潛消吉祥沓至兵絕自焚

之禍載戢載韜國延不拔之基可長可久

典獄行空獄後般若道場文

蓮花寶座如來為兩足之尊貝葉雄詮般若極
二空之旨歸崇允篤報應端加顧循眈眈之資
司牧元元之類惟刑是恤竊思伯禹之泣辜諸
罰所加恐有治長之非罪况盛夏敲蒸之節豈
生人焚毒之時尋命有司盡寬庶獄冀託空門
而乞援永蠲肺石之受辭茲敞熏筵俾揚靈典
庶有加之惻愍格無導之照詳不惟囹圄之空
虛清淨以理抑亦國家之閑暇優游爾休

國卜二十六分功德道場文

夢授秘文異矣神僧之勸囑心生正念遍諸靈
府以護持願以眇躬臨于大寶常懲酖毒尚無
一日之安况考龜謀當燄三秋之節斯授正法
覲借丕祿招五德之真流轉十方之聖號伏願
仰承覺力更仗神威消患未然善涉鱗時之代
降年有永益延眉壽之祺

東林寺行疫病祈禳召龍道場文

真乘最妙佛與佛以護持善囑猶存人非人而
歡喜苟勤熏奉尋沐恩慈顧時令之傷和亘民

居而被後后非衆罔與守敢寬矜恤之心天作孽猶可違竊計禴禳之要宜投法寶用巧梵庥陳覺席於鴛廬演靈文於虬藏伏願真風所作環宇同加將樂將安永絕陰陽之寇既繁既庶咸躋仁壽之鄉

西京興福寺本國世尊齋無講華嚴文法身清淨莊嚴日月之光聖教圓融包括塵沙之界自先王而崇奉延景祚之綿洪肆予寡人式是成訓當首冬之令序遣膚使於陪京祇仰慈庥嚴六時之熏範仍開講席演九會之極談

庶諒純誠遄加妙援措邦基於鞏固無疆惟休
亘民宇以安寧有截其所

同京重興寺說金經文

龍王歡喜願

二妙真源一乘極致弘深微密為四佛之護持
宣暢敷揚遍群龍而歡喜念惟涼德叨履丕基
早勤向內之誠歸依於法行荷無邊之福康濟
斯民茲遵先祖之貽謀爰取孟冬之良日特馳
膚使祇扣精廬旁招毳衲之流俾演貝文之說
伏願潛鱗薦祉導風雨於不迷黔首樂生舉室
家而相慶

同京金剛寺文豆婁道場文

化不可思廣被恒沙之刹力無能勝莫尊神印
之門言念寡躬叨承景祚憂深慮遠尚微綏馭
之長謀隙發間生恐有侵陵之獷俗庶憑妙援
逆折遐衝遣華使於別京敬香筵於淨宇召迎
真侶宣演秘詮仰惟方便之私曲借神通之應
兵戈韜戢永無外侮之虞社稷靈長坐撫中興
之慶

鎮江寺九佛齋文

水失性則爲災自古所患佛隨機而應物無求

不從眷彼大江攝于隣國歲漂流其民戶日朘
削於我疆以人力之區區固難障塞投覺慈之
浩浩行借神通茲遣朝臣伋嚴齋範辦天厨之
淨饌燒海岸之名香伏願甘露普霑狂瀾永息
農桑千里永無蹙國之虞烟火萬家盡遂安生
之樂

國卜延壽神王道場文

千百億化身之慈尊廣宣妙藏一十七神名之
聖典普利恒沙言念冲人叨臨大寶聚門同域
莫窮禍福之源旋心正基伋考古凶之漸謂屬

秋行之季宜防月厄之萌斯扣覺庥式陳梵采
集毳衣之淨侶繙玉軸之靈詮庶仗勝因篤承
慧援釋災危之未兆若冰渙然享曆服之無疆
如竹苞矣

典獄行空獄道場文

佛為事時一現世廣演法音后非民同與守邦
貴行仁政念循耿質奄御群生厥德靡常雖不
孚於心服惟刑之恤切欲至於訟衰茲下勅於
有司悉縱囚於非所庶蒙梵蔭永不用於金科
祗敬熏筵俾特繙於玉軸洪惟覺鑒邐借慈庥

民趨淳厚之風無干國禁世致泰平之慶永固
邦基

望山樓上雲雨道場文

覺皇救物演茲甘露之門旱魃爲災借以大雲
之蔭念循否德叨荷丕基迺緣刑政之差屢感
陰陽之氣自春不雨吝若屯膏入夏愈乾赫如
觀火呼蒼天而莫聞覩赤地以長吁當始種而
失時已無可奈在既耕而望耨猶有庶幾茲扣
等慈行蒙洪濟名集塋衣之侶敷揚貝牒之編
庶諒誠虔僉加扶護既霑既足克宣三日之霖

實栗實堅終叶千箱之慶

十負殿行香文

以心傳心雖絕有為之法惟佛與佛亦開應供
之門自先格南面以還嚮祖師西來之意直於
禁宇置此道場譚向上之宗乘資無邊之梵福
式至今日不愆驚章茲消選於良辰特蠲嚴於
淨饌仰千輻輪相痛罄瞻依拈一瓣檀香虔申
熏奉至誠所格妙蔭即加延曆服之綿洪永于
多享措邦家於康泰終然允臧

弘慶院行阿吒波拘威大將軍道場文

佛慈廣大開利物之勝門神力猛嚴現護世之
靈應伏念乘時季叔襲位艱難業未應於一十
限幾臨於百六况歲行正壓於城都而金木相
剋抑時令不孚於法曆而陰陽屢愆嗟予叢爾
之資鍾此顯然之變夙夜憂懼淵冰戰兢庶憑
善救之私逆杜未萌之患敝法筵於寶宇宣貝
藏之微言伏願甘露普霑真風旁暢戢下戈橐
弓矢四方無虞保社稷和人民萬世永賴

奉恩寺燃燈道場文

梵雄出世廣開利物之妙門竺域繞城始唱燃

燈之淨範自先格而崇典洎後葉以流光言念
冲人式遵成訓卜良宵於春籥嚴覺席於金園
蕙炷千缸爛若光明之海珍羞百味霽然供養
之雲所締勝因即通他鑒伏願禎祥滋至曆服
彌長措國步於永寧固如定鼎亘民區而同慶
熙若登臺

王后殿還願佛宇通行齋文

妙鑒難思曲遂祈求之懇至誠所格敢愆報謝
之儀言念眇躬圖寧內壺方春尹始投柰苑以
歸心卒歲于今見椒房之享福爰踐皎盟之旦

卯
卯

旦益輸素信之區區祇按淨科聿嚴熏席仰冀
神通之應更加攝護之慈俾爾熾昌保壽祺於
千載又當輔佐播風化於四方

西京重興寺說金經文

龍王歡喜願

蓮臺妙覺開秘藏以演宣水府潛靈聞微言而
歡喜念登君位祇率祖謀消玄籙之令辰維其
時矣輟紫樞之邇輔于以送之俾扣精廬式張
熏席邀六和之淨侶暢二妙之真源舌本所揚
鱗宗同慶陰陽不僭迎協氣之橫流風雨恒調
致嘉生之大稔

修文殿行佛頂道場文

希有世尊廣演三乘之海藏最尊神呪獨稱千
葉之蓮華苟切奉揚桑加保護念承祖統圖保
邦基民所息肩雖或關乎朝政佛猶加頂莫如
崇此法門祇率舊章寔張熏範仰止慈悲之鑒
轉茲微密之言庶諒精修即加妙援膺受多福
茂延久視之期阜成兆民永撫丕平之業

疾疫祈禳召龍道場文

云云如來攝疫之門應病投藥仁主恤人之政
若已納隍苟尊閣以奉行即靈承於護蔭念循

涼薄叨襲重艱常以百姓而爲心庶無一物之
失所年其饑嗷猶恐鄒民之轉溝暑或敲蒸尚
期周后之扇暘况復有罹於疾病可能忍視於
湏臾期託等慈仰祈善救俾暢真詮之最勝庶
令靈府以同歡欣願扇以大和掃里閭之沉頓
篤于純嘏致家國之寧安

康安殿季月大歲道場文

三身覺帝開妙藏以演宣百部靈官聞微言而
歡喜眷惟冲眇職此艱難天吏相循常懼虞疑
之漸后祇方王益憂發洩之災招集緇沔暢弘

聖典伏願佛所護念神罔惡忤爰處爰居永擁
康寧之慶可長可久益延胡考之休

法王寺八關說經文

三舟一月雖諸法之同歸五水千瓶獨八關之
淨戒自先祖而深信著甲令之不刊言念後侗
式遵前典當仲冬之令月張盛禮於廣庭願鍾
鼓之畢陳非以自樂欲人天之同悅曰啓太平
茲卽香城寔嚴梵事邀鷲峰之開士演龍柱之
靈文伏願承佛力之加持亘民心而康豫致庶
邦之丕享無遠不懷保萬世之慶基垂裕罔極

醮疏

本命醮禮三獻文 初獻

天高也星遠也不顯其機道生之德畜之所因
者本祇嚴法醮覬借靈歆

亞獻文

剖裂元情夙荷生成之化薦羞剛信寔陳蠲潔
之儀翼諒純誠僉加景貺

三獻青詞

天乘氣而立雖宅至虛人受命以生敢孤洪造
念循寡昧叨守盈成若將隕深雖慎艱難之寄

無曰在上尚勤寅畏之心况臨資始之辰宜罄
由中之素茲崇典紀行在真遊仰惟杳默之精
端借提撕之力致令災危冰泮福履雲臻予一
人輯爾邦享年有永與百姓同其利為世尤長

祈恩直宿拜星文

馭陰陽之氣著象上穹隨甲乙之行管人下界
言念眇微之品幸依臨炤之光加精致誠特展
齋明之祀稽首拜手倅伸祈叩之儀庶在仙遊
曲歆信薦自天保佑俾膺滋至之休享國以長
丕擁太平之慶

國卜十一曜二十八宿醮禮文

星宿騰精而列于天人所瞻仰神明應變而通
乎物信可薦羞輒貢危辭敢干聰聽伏念臣以
眇冲之質承重大之權念至於憂雖軫臨深之
抱禍生所忽尚圖杜漸之方况憑龜兆以稽疑
合屈鸞駟而徵福茲循道範式峙法壇庶歆茲
苾之儀僉隨高高之眷則篤斯慶延景命之無
疆永孚于休保昌圖於可久

星變祈禳十一曜消災道場文

州國官宮之象著在乾文貌言視聽之差動為

天譴宜披猜懇仰乞陰休伏念臣猥以無良尹
于有衆王綱漸弛不堪解紐之憂國步斯危常
有綴旒之懼况受日官之察變屢言星度之失
常茲乃出於愛人欲其修省苟不深於罪已曷
可消除斯譴爰特嚴法事集黃冠之道侶諷
紫焚之靈文伏望曲借居歆加享佑三辰軌
道更無陵犯之災四方近衛寢致榮懷之慶

先告祝

仰觀于天深懼丁寧之譴洞酌彼潦將迎杳默
之精惟冀香官道可臨法醮

內殿行火星醮禮文

主禮主視為德最尊作以八作祥報人不僭眷言
耿質仰止真寐可畏惟威常軫嚴恭之素必視
所在庶無乖戾之行漢書云雖天子必紀法星所在何涂月之
紀時向房星而犯變稱為法使雖出入之無常
謫示人君欲飭修而有省茲深危懼切備禱儀
敢依金籙之科祇展琅庖之薦伏望享一純之
禮表三從之休兵革載韜永絕四方之警言宗祧
不拔增延萬世之基

春例高燈醮禮文

至神不測據玉境而宅虛小智自私掛金釭而
湊懇雖甚微之一炷庶欲通於九門今屬仲春
式遵前典祇潔雲壇之醺仰邀飈馭之遊異借
格臨遄加歆允致令梗災招福永延壽考之祺
濟世安民克保盈成之業

忠州大一醺禮三獻文 初獻

仰察靈躔直巽維而垂曜適當令節消辛日以
薦馨幸墮春於層霄俯歆誠於涸酌

二獻文

至道之精之極雖絕窺思明信可薦可羞式陳

菲薄庶紆歆格優錫吉康

三獻文

天何言哉默管萬生之禍福神最貴者主行八
政於陰陽眷惟眈眈之資謬襲丕丕之緒思念
朝夕顧無一日之宴安輯寧邦家須賴十真之
保護迺卜炁臨之地寔陳蠲潔之儀庶借居歆
遘加孚佑致令六氣不忒風雨節寒暑時三農有
成茶蓼朽蒸稷茂干戈韜戢海宇晏清

福源宮行天變祈禳靈寶道場無設醮
禮文

災異譴之蓋欲省愆而痛勵神明彫彰矣尚容瀝
懇以宗祈言念眇躬叨承景緒命惟休亦惟恤
斯無厥位之安應以實不以文常畏彼蒼之鑒
然由事統之多闕迺致乾文之示祲火度犯大
微上將而便入於天廷月行陵輿鬼積尸而復
侵於女御况屬水官之用事又聞雷鼓之發聲
怒其甚威意若有謂曰帝居甚遠猶曉告之孔
明故臣意未安將被禳之是急爰投仙宇俾敞
道場旁迎鍊氣之流寔揚靈蘊仰佇排空之馭
兼薦信羞伏望寶曆遄加繁祥杳至邦家帖泰

百祿是摠是道兵革韜戩四方無侮無拂

北斗下降醮禮文

天清而上鼓一氣於混元斗轉于中括萬生於
下界厥監不遠有信可羞顧惟冲眇之軀叨荷
艱難之寄神所勞矣雖非愷悌之資命不易哉
常畏高明之鑒况彼泠然之馭適于降止之辰
宜罄禴悰仰徵玄福按冲科於仙籙嚴法事於
靈壇惟冀高真俯歆卑素降年有永登玉籍之
長生垂裕無窮保羅圖於不拔

九曜堂行天變祈禳十一曜消災道場

無設醺禮文

災象過而告人各曰類至天棐忱而佑下宜以
實祈言念眇資實惟涼德早承丕統式克至今
日休庶保永圖不敢替上帝命然由言貌之有
失加以政刑之多愆民心未孚乾變隨見咨彼
歲星之行緩迺爲火曜之追陵况天使飛流而
騰迹於文昌抑雷公憑怒而發聲於玄月且悔
吝存乎介當軫殷憂故思念至于勤行資陰隲
祇接仙館想覩靈光招素券之先生諷吟秘簡
備玄壇之法醺蓋薦菲儀伏望悃悃潛通吉祥

日 李校尉集卷之五
一六
荐集七政協璣衡之正不忒不差四方無抱鼓
之鳴寢昌寢盛

祈雨大一醮禮文

食為之命一穀不登則飢神感于誠五經莫重
於祭以予否德召厥咎徵自夏以來以致乾焦
之沴而民可罪已懷餓殍之憂茲軫焦勞未遑
宴逸至誠不息曾陳祈叩之儀小信未孚尚阻
汪洋之澤間雖滋潤未至渥優宜高哀籲之誠
期聞聽卑之耳斯循秘籙式展精禋伏望呼召
神龍驅除旱魃五風十雨允孚時若之休萬廩

千廟終叶年豐之慶

真武醮禮文

水位秀氣金闕真尊雲騎神鋒耀明威於六合
靈符寶誥贊妙化於九天越惟眇末之資佇荷
保持之力篤披精懇嘗切瞻依况青陽楔水之
辰是白日升仙之旦爰循祕訣特展明禋敢期
不息之誠儻格至玄之鑒佑冲人之未逮俾躬
虔休保景業於彌長維命不已

神格殿行天變祈禳靈寶道場無醮禮
文

天不言以喻蓋指象之甚明道善貸且成尚冲
靈之可扣眷惟不穀叨襲丕基夙夜以求以思
雖勤於臨政貌言作甫作又未協於叙倫比聞
日御之告災無奈月行之失度與熒惑歲星而
同舍不其異乎入旄頭羽林以交綏亦可惧也
况金曜之猛怒逼大微之魏我遂卽西蕃突于
大將觸曰犯居曰守豈惟滅劒之間漢書注云
滅函也
食不甘寢不安茲軫履冰之慄庶憑陰相終社
禍胎仔九霄之列真敬邀冷馭集三景之高第
朗詠靈篇仍峙仙壇式陳法醮幸諒傾輸之懇

曲加保佑之私軌道無差五緯若連珠而表瑞
戢兵不用四方如按堵以致寧

東國李相國全集卷第三十九

卷之五

七

東國李相國全集卷第四十

釋道疏祭祝

翰林誥院并

大一醺禮文

初獻

云云陟降三台常處最尊位亭毒萬物潛施
不宰之功敢陳酌滌之儀佇在乘風之馭云云

亞獻文

反時為災天將戒耳精意以享神必福之幸借
顧歆端消變異

三獻青詞

變化無方常善救物吉凶不僭職竟由人苟傾

祈叩之誠即荷畀矜之賜以予過舉召殿咎徵
當盛寒之戒時有恒燠之為沴况雰雰終朝而
閉塞或雨潦連日以侵霽寔深兢灼之懷行借
高明之佑致令陰陽常順無冬愆夏伏之災符
瑞竝臻有天降地升之貺

年交道場兼醮文

窈冥莫測道無古而無今消息不停年有終而
有始念臣微薄襲位艱難夙夜憂勤猶未安於
一日陰陽推代况欲及於三元宜憑佑下之私
用集履端之慶茲泐仙籙聿峙法壇邀羽服之

高流諷琳編之秘蘊仰惟靈鑒造界真庥頓消
未兆之災若水將泮丕擁惟新之福如日方昇

順天館天皇堂修理後保安醮禮文

有精甚真宅玉宸於天上救物無棄留瓊館於
人間頃因棟宇之傾頽尋命工徒而營葺茲移
法仗有動常居及力役之方終棟日辰而還妥
仍陳典祀祗叩冲庥庶臨菲薄之儀曲借顧歆
之賜復真游於華構既保靈栖墮寶眷於重霄
益綏多福

玄武門望北郊醮禮文

天生蒸人意豈欲其勦絕國有關政時或降之
旱乾苟謝過以哀祈即應誠而孚佑顧惟涼薄
叨處崇高夙夜克勤雖未遑於假寐賞刑多濫
動自召於咎徵適當盛夏之辰久苦亢陽之厄
肆投真蔭庶借陰庥水德所存望北郊而稽首
蘋羞可薦採南澗以展儀仰冀涖涖僉歆必必
普霑甘澍使百穀以勃興大有豐年致千倉之
露積

大倉行大神醮禮文

天降之咎靡不由人神享于誠常無弃物敢干

聰正用乞恕矜念乘衰叔之時叨荷重艱之寄
憂深慮遠尚難振起於頽綱政散民離是用感
傷於和氣當孟冬之閉塞有大電之震驚繼以
火祲焚茲廩實莫重於穀忽蕩滅以無遺雖有
其邦顧空虛而安恃是寡人所自召也彼群俗
有何辜焉茲盜戰兢竊思禳解聊罄齋明之信
式陳蠲潔之儀仰冀赤精曲歆丹懇炎威自却
蔑聞燒鷺之災露積復崇允協夢魚之吉陰陽
常順社稷永寧

道殿行爲東宮還願醮禮文

初獻

為德最盛潛施善貸之私無思不酬祇奉克禋
之禮庶臨掄席俯享蘭羞

亞獻文

愛鐘儲貳夙陳祈叩之誠澤降杳冥果借提撕
之賜肆尋信誓爰藏精裡冀歆悃悞之衷申錫
綏將之慶

三獻青詞

神明為道精之極化無私焉父子有天性之常
情所篤也曾叩高真之杳默仰祈元嗣之康寧

冲蔭所加果集和倪而善保齋盟猶在敢誣靈
鑒之孔明斯按仙科式陳法事倏雲階而延佇
想飈馭之格臨伏望俯允微誠益紆陰騭天休
滋至畀百祿之無疆儲德愈光遍群生而有賴

壓火神醮禮文

妖異之興各因過舉壓勝之術唯在宗祈顧人
所資惟火可畏順時行令雖防濫發之萌失性
為灾尚慮不虞之變况觀玄象之乖度殆有赤
精之作威祗陳菲薄之儀佇畀保持之力致令
自諸宮宇永無濡褐之勞及甬里閭不見焦頭

之救

上元醮禮文

初獻

陽管吹灰適臨既望陰官奏籍正屬茲辰虔峙
雲壇覬迎颿仗

亞獻文

佑下無私孰知真宰朝元紀候祗展明禋冀紆
歆格之私僉錫熾昌之慶

三獻青詞

道常宅於希夷迎隨不見神若存於恍惚禍福
無常念眇眇之資臨元元之衆克艱王業居多

夕惕之心寅奉天威嘗畏日臨之鑒况屬群仙
之校錄宜邀上帝之保持恭按真科式嚴淨醮
仰冀冥然之聽優加惠我之私擁茲福之方將
永于多享保羅圖於可久展也大成

先告祝

火鈴交擲榆席方陳天遠乎人猶未經通於仙
陞神為之使庶幾贊降於靈場

本命醮禮文 初獻

序紀仲炎日丁元命洞酌寔陳於信薦嬰香可
引於真遊仰冀冲虛賜歆芬苾

亞獻文

辰居其所默制群生人本乎天敢孤洪造許歆
明信優錫繁禧

青詞

大道為陰陽之祖人所由生上天司造化之權
工而不宰眷惟眇質夙託真麻受命無疆惟休
靈承帝事俾予從欲以理簡在上心茲臨元本
之辰益行高明之眷按冲科於三洞祇歲精經
邀仙仗於九霄覬歆薄禮純誠所格孚佑端加泮
渙優游保身宮之帖泰熾昌耆艾享壽錄之延洪

南辰解厄醮禮文

道貫三才幹化樞於天上神妙萬物掌生籍於
人間伏念臣位襲投艱念深防患常涉四時之
遷代尚無一日之宴安智微先見之明問於卜
正肇有可移之理當者偶人茲憑汎汎之舟將
付滔滔之水庶歆嘉薦僉借真庥凡曰災萌隨
東流而不返俾予壽錄與南嶽以彌長

星變祈禳三清醮禮文 初獻

察珠躔之錯度慄慄若墮于深叩玉境以翹誠
洋洋如在其上虔陳馨祀行在靈遊

亞獻文

感變而懼寔深臨谷之心無安惟危敢瀝籲天之懇庶矜誠告永杜災萌

青詞

災異譴告職由刑政之差寅恭側修可動神明之鑒伏念臣當百六之會據九五之尊凜臨兆民雖早服夏書之明訓協用五紀顧未孚洪範之彝倫况今月犯羽林而又守端門星出輦道而便入河鼓金惟見晝木或稼冰是否德之所招尚何心而自逸朝過夕改苟勤悔責之誠居

高聽卑奚吝恕矜之賜諒予哀籲借以居歆致
令三光明四時和休徵咸若百姓樂萬邦悅協
氣橫流

先告祝

雲間鸞鶴馭不妨暫降於塵寰地上蟻虱臣曷
可敷聞於仙陛庶幾贊導毋至稽遲

老人星醮禮文 秋旦行

白藏紀候適當晷漏之均程黃大騰輝可卜壽
齡之益筭敢傾卑懇仰叩聰聞伏念臣以寡昧
之資據崇高之勢深思遠慮雖勤制御之謀又

卷之四
七
視長生須荷照臨之助載占旦見彌罄心齋肅
陳酌彼之儀行枉冷然之馭伏望靈光不顯寶
瞻端加俾予冲人永延洪於慶曆燕及兆姓咸
漱吮於大和

大廟告望無薦新穀祭祝

候三五於高冀方茲告望取十千於周稼無以
薦新幸諒孝悰俯加聰享

老人星祭文

揆景內衡方紀秋分之候騰精南極可占旦見
之祥恭率舊章寔修明祀冀借歆容之賜俾延

壽考之休

宜州立石祭祝

神所憑依有斯石之特立信可羞薦酌彼潦以
克禋庶享純誠益紆陰相

馬社祭祝

法施於人俾知乘馬秋祭于澤敢怠禮神宜歆
採澗之儀俾阜在垌之畜

諸島捉馬祭祝

薄言駟者有騅駟將克邦用于以湘之維錡釜
敢黷神威庶令奔逸之群咸入繫維之內

零星祭祝

食為民命權係天田方嘉穀之向成陳信籩而
瀝懇庶歆誠享終賜年登

道誥國師祭祝

研磨戒行德動於人天洞朗陰陽功施於邦國
想高風之猶在陳明信之可羞仰覲慈靈儻加
聰享

龍王祭祝

諸處通行

德應乾爻莫測飛潛之用律生允氣式陳嘉靖
之羞庶枉靈歆導宣協氣

簡陵修理次大廟景靈殿告事由祝

窮窶賢妃埋玉僅移於百歲穿窬小盜摸金有
及於九泉茲危懼之交懷圖繕完而復舊先陳
信薦仰叩聰聞

憲陵修理同前祭祝

國風寢薄漸無禮法之隄防盜計得行有及祖
宗之陵墓方臨繕理敢告因由

壽陵修理次同前祭祝

人之無良值寢園之隙圯我是用嘆興土作以
繕完薦此馨嘉佇于安妥

景陵修理次大廟及景靈殿告事祝

有藟仙寢甚於高廟之盜環將起土功採彼魯
溪而薦藻幸加歆諒永冀虞疑

乾陵修理次松岳及諸神祠告事祝

值坏土之見虧將修先寢備勺觴而潔薦虔告
靈祠幸借歆容許詳端緒

諸神祠祈雪祭祝

葭籥向窮猶歎同雲之澤麥苗就槁將為嗣歲
之艱虔展祀儀敢徵陰佑庶導九玄之賜罔稽
三白之祥

王輪寺丈六像出汗祈禳諸祠祝

歸彼寶坊煥然金像淋漓被汗忽彰祆異之徵
戰灼在懷祗舉禋禳之典庶歆信薦終滅災萌

西京諸神祠行重興塔天震祈禳祝

逝矣鴛宮震茲鴈塔燁燁電威之所及九級無
遺茫茫天意之未知萬心同懼肆修明祀遣叩
靈闕庶加護攝之私終杜虞疑之兆

大廟閏月告望祝

陽餘曰閏方臨月望之辰潦酌可羞聊致時思
之祀庶加明允以副孝誠

大倉行百神位謝土祭

天威可畏降亳社譴譴之災民命所關掃周家
栗栗之積為妖莫甚何術以禳徒陳菲薄之儀
敢叩靜柔之鑒庶歆中信永杜後艱

八關日 祖真前動臺告事祝

講此禮文已致在天之風馭寓茲機巧將旋殷
地之雷輪先告端由庶無驚駭

大廟臘享無薦魚祭祝

蜡索萬物式陳苾苾之羞庶潛有多魚無備崇奉
之薦幸加聰享以答孝悫

客使辭退宴景靈殿告事祝

宴以示慈將餞言歸之客祭則致敬先伸敢告
之儀卒事無虞惟靈所相

立春藏冰司寒祭祀

取彼堅冰將藏於凌室酌茲行潦祇扣於靈關
庶借陰庥道宣協氣

春例諸國師真前祝

種群生之福為百世之師遺影尚存宛若開堂
之日韶陽載屆遣陳酌水之羞道鑒不遙誠心
可享

轉料發船祭祝

水轉粟曰漕利涉為期神依人而行靈威可仗
將掛帆而臨發敢薦藻以告虔虔賜順風導依
彼岸

大廟閏月告望祭祝

斗杓斜指時方紀於積餘月魄既盈禮敢愆於
告望幸歆薄薦小副克誠

仲農祭祝 神農

揉木為耒肇興耕耨之謀採蘋盛筐肅展吉蠲
之饗惟歲之稔繫神是憑

后稷

有相之道始播穀以粒民可薦於神斯酌潢而
潔祀宜享齋如之素遄加貽我之祥

經行日景靈殿告事祝

僊彼闕庭將授經以徇路扣于仙寢先寓信以
陳籩庶仗祖先之靈永除疾疫之氣

秋例社稷祭祝 大社

贊天主地物彙於焉資生除土立壇古今所以
崇事屬仲秋之令序消上戊之言辰祗展薄饗
仰祈大稔

后土祭祝

作土德之官利施萬世候金行之令祭致一純
潢潦雖微京坻是望

大稷祝

食八政之先孰尸焉者神五穀之長其至矣乎
冀歆黍稷之馨俾遂倉廩之積

后稷祝

稼穡功高粒烝民莫非極類繁禮薄有明信可
薦神惟祀是歆迺農之慶

冬享大廟七祀祝

饗于祖禰禮方致於燔毛邀爾神明祀特先於
薦賢庶同九廟益衛三韓

祈雨望北效祭祝

地財方長天澤久愆况當南火之辰遭此亢旱
茲致北郊之告禱于明神惟冀靈威僉加聰享
以一雨霑然之賜慰三農仰止之心

二度祈雨祭祝

農欲及時天猶吝澤惟德不類迺招旱暵之災
斯民何辜舉有無侵之懼茲陳信薦再黷聰聞
幸加甘澍之霑澤普潤嘉生之枯槁

開冰司寒祭祀

挑棘以除方啓陰寒之室蘋蘩可薦敢干聰直
之靈冀倍明歆導宣和氣

告望大廟無薦麥稷挑祭祀

舍挑始熟宿麥初登方茲告望之辰無以薦時
之禮洪惟聰鑒俯諒孝思

上辛祈穀圓丘祭祀 上帝祝

上天之載無聲物資以遂有國之本在食人時
而生方屆上春用祈嘉穀非帝之賜斯民何資

五帝通行祝

食先八政將陳孔夙之祈祭重五經聊展可羞
之信享茲嘉靖畀以豐登

配帝祝

東秩協時南郊有事思皇烈祖功莫大於肇基
克配彼天禮亦宜於古訓宜臨侑坐助介年祥
誥院述

消災道場疏

踏山出海巍然統電之威身點鐵成金妙矣靈
丹之神呪一心歸仞六臂扶持言念眇冲夙叨
艱大政未張於琴瑟動昧變通民方墮於溝坑

罔圖拯濟紀綱所紊恠異滋彰忽遭赫赫之災
精大掃陳陳之積廩萬民生命一旦寒灰此尚
疚於中懷而未遑於假寐矧靈臺之觀象多星
度之失躔焚惑入羽林而逆行大陰與木曜而
同舍未識如茲之譴終為何等之祆既往之災
雖甘受天威之難避未然之患庶確憑佛力以
逆消茲扣勝門覲蒙真蔭結香泥之界虔敬梵
筵繙玉軸之文特宣密藏熏功總集慧鑒已通
伏願五緯循常八風協候干戈輶戢坐臻萬戶
之晏眠禾稼豐穰遄復千圉之露積胡虜絕窺

齋之志邦家延悠久之基

大藏經道場疏

釋佛教如一味海本絕酸甜同異之差由人情
有三種根故標大小偏圓之別苟冥心而懸解
即會極以齊駢念以不良臨于有衆夕惕若厲
居無逸豫之心禍生有胎常戒幾微之漸尚緣
事統之多闕屢致乾文之示祇金忽犯於大微
木復干於熒惑寔深兢灼益切解穰宜投微妙
之門仰荷慈悲之援斯必舊典宏敞熏科千指
緇貫線之文高張法網一槌辨拈花之旨彌漲

祖源甫築切山即通覺月伏願災萌不朕福聚
增深兵革韞藏中外絕風塵之警言朝廷輯睦將
相如水乳之和

同前疏

梵雄始吼而言泉漲闢衆妙門菩薩嗣唱而教
翼張作大寶藏浩汗渾涵則譬滄溟之包瀦百
谷敷揚宣暢則同甘澍之霑洽四方但論崇奉
之如何毋慮感通之未速伏念襲祖宗之遺緒
承廟社之重權一日罔寧如馭朽索之慄萬機
易素猶理亂絲而焚頃遭胡寇之橫行幾致邦

基之陵替繫仰賴多天之助即坐臻強敵之摧
如執熱之濯清民雖小息若懲沸而吹冷予尚
未安况聞日御之獻言連報月行之垂度或干
諸侯之位或八大微之躔加又閱陪京馳聞之
辭有大石自移之變物無脛而行也必異於常
禍有胎而生焉曷知其漸益深戰惕切計禮讓
須憑最勝之緣可杜未然之患恭循舊典宏敞
熏科扣鑰虬函振葉屑之微說拈植塵席馳雷
舌之高談所鑿獻者我誠想森陳於聖鏡伏願
災萌永息福聚彌增風雨順時茂破塊鳴條之

異穀粟盈廩播崇墉比櫛之謠羌虜遁藏邊陲
靜謐

星變消災道場疏

如來旋教令之輪身現怒像神呪熾光明之焰
威服群魔苟結界以歸心即轉災而為福伏念
乘時板蕩託位重艱若抱火厝薪雖軫思危之
念如膠柱調瑟莫知通變之機故制度未得其
中而怨謗多興於下况經征戰已後多是瘡痍
之餘民亦勞止而有甚尾頽國已病焉而幾至
蹙矣政刑所失恠異滋彰近承候史之言連有

彗祲之見或大陰掩軒轅之度或流星入羽林
之庭天譴孔明蓋欲寡人之省寤予德不類且
將何善以鎮禳惟茲微密之門實是神通之印
竭帑藏而黷祀也不若借靈丹之力繕甲兵而
嚴守也不若伏金杵之威茲闕禁闡式張覺席
香泥塗地歸淨範之莊嚴貝葉開函厲梵聲而
宣振精裏所格妙力遄加伏願六氣順時五緯
軌道干戈載戢內奸外侮之自消刁斗不鳴東
鄙止騷之永靜云云

西京行天變祈禳毬庭醮禮文

初獻

在天在地有象有精苟誠忱之可通即上下之
靡間庶紆格止俯允齋如

二獻

不知名強為名所謂道也常救物無弃物其惟
神乎冀諒齋明僉加保佑

三獻青詞

政失此變見彼其若影形天雖高聽必卑可交
恍惚伏念臣忝克艱之位臨可畏之民雖摩撫
有加而如視孩兒若酸醎失適而難調衆口故

屢有興言之聒聒亦豈無人惡之嗷嗷否德所
招咎徵頻作候星官之行則多越於常度觀歲
位之居則適臨於忌方莫知漸兆之幾微庶賴
沓冥之保衛倂投翼邑仰屈羽車覬垂歆格之
私端降綏將之福兵戈自寢無火焚不戢之憂
社稷彌長保山固難移之祚胡虜莫窺於國尾

國語云邊城
謂之國尾

中外得息於民有

東京行季年祈禳毬庭醮禮文

初獻

道本至虛雖常形之莫詰神無不在隨所敬以

皆臨嚮千里而馳誠覬百靈之枉駕

二獻

羽葆芝軒枉真遊於下界縹緲絳字訴危懇於重霄享于克誠介以繁祉

三獻

氣判上清下濁神行乎間祭致一純二精應在于通伏念臣嗣承祖統奄茲民區念長轡遠御之謀痛加勵飾無大明旁燭之智動閣幾微其在朝昏尚難宴息陰陽推代雖開天數之常晦朔會交猶戒禍胎之漸况採言於邃術當有忠

於季年底仗真麻獲迺景祚爰取妙商之婁節
倅投陪邑之殊庭祗展法壇仰迎仙仗藉茅席
地猶可降於靈真酌水獻花庶俯垂於臨格伏
望金紵聰享旋錫純禧膺服無彊必等南山之
壽邦家永泰一如東戶之時內無犯紀之人外
絕窺邊之虜

先告祝

自下界而去天幾萬許步諒卑誠而降駕在一
頃間然無四直之靈孰達九門之路贊而格止
心固望焉

上京行絺庭醮禮文 初獻

靡神不舉闔上下界以同邀有信可羞無厚薄
禮之斯責仰惟風馭俯降雲壇

二獻

道寥兮若無迎之不見神洋乎如在感而遂通
幸已垂華葆之一臨異更許洊觴之申獻

三獻青詞

天地肇分於是有神祇之別陰陽不測故嘗司
禍福之權苟傾懇倒之誠尋荷提撕之賜咨予
冲眇職此艱難適遭家國之搖攘頻致羌戎之

侵突雖有金城之險勢於心猶且慮危迺遷天府之輿區其計要將避患何大敵尚窺於逋境抑祇星屢見於上穹是否德所招自可甘蒙其孽而愚民何識忍令同被乎災如疾在心維憂用老思所以善閑之術凡莫如陰佑之私况殊庭克祀之儀是歷代不刪之典肆循成例益罄精衷肅陳潦酌之潔蠲敬佇飈遊之臨格異歆微薄僉借扶維致令沴氣旋消善祥荐至禿兵自熄若火滅以無遺五業中興如竹苞而益固璣衡不忒箕畢常調

東國李相國全集卷第四十

東國李相國全集卷第四十一

釋道疏

爲相府襁丹兵大集神衆道場疏

我佛在大寶坊庭始演雄詮之微妙諸神護恒
沙國土蓋因善囑之丁寧尊閣苟勤靈庥即通
伏念某等叨荷官榮之越分略無智識之防微
火將焚家不早受徙薪之計虎已入室方欲施
固檻之謀故令胡羯以乘閒垂逼京師而肆毒
或據食公倉而燒其遺積或掠娶人女而磔爲
僵屍州郡之丘墟者自西而東寺宇之灰燼者

在十則九地不拒足雖暫容山野之狂馳天固
臨頭必不赦雷霆之顯擊何假須臾之喘息尚
揚遐邇之腥膻無可奈何所難忍視舉朝廷而
同憤微計策之可施唯我妙門超於諸法若奉
寶幃之神藏宣暢真音即令上界之天兵摧伏
強敵方開熏席未及且朝果增士氣之飛揚快
見寇兵之奔遁自聞捷報大快衆心益加歸仰
之誠申敬熏勤之範伏願神威所助我虎益張
類三箭之定天山官軍速捷無隻輪之返秦國
虜種悉殲

同前攘丹兵天帝釋齋疏

釋王統六天於上界禍淫福善之無差我國是
四洲之仁方敬佛歸僧之有漸如或訴急危之
變忍不垂憐憫之心懷彼契丹之餘民臣于女
真者有載翻如吠主之犬叛國橫行終類失林
之麋舉羣狂顧突來他境反作我仇寄人之土
而殘人也多奪人之食而害人是快雖老嫗弱
兒也殺之無赦雖孕駒乳犢也屠之無遺或燒
殘佛寺而皆委於燼灰或破壞梵書而至投於
溷廁斯謂戮之心也夫豈人之情歟以如此之

凶殘似不保於頃刻何苟延於歲律而屢抗於
官軍然災不妄生人所自召無奈羣臣之積釁
致茲大寇之肆淫宜各省愆以圖弭禍過勿憚
改苟勤悔責之心孽猶可違儻有省冥之助是
用收文虎之月俸備晨夕之齋厨仰扣綿臺特嚴
雲供伏願仗神威之助增士氣之揚王師所臨
如疾雷之震地虜種自熄猶燭火之投河

同前六丁神醮禮文

分上下於紫微彌稱六將輔左右於玄武力敵
萬兵苟以誠祈即蒙應速彼胡雛之種本獬犬

之孫太繆厥土之失憑闌入我邦而行掠此特
盜之巨者豈是國之敵歟然狼顧之民習已成
於吞噬抑烏合之衆力能扇於翼張三東土皆
爲所屠自古今未見如此伏念某等忝經邦之
任無濟難之才挺胸仰嗟徒極焦勞之思聚首
環顧莫論制禦之謀雖云國厄之所鍾亦出吾
儕之無狀唯我神明之化行於恍惚之間搖大
地不爲之難移五岳不爲之重矧茲頑寇不足
煩怒電之費鞭輅暫借靈符尚可掃腥涎之滿地
肆叢衷懇式展明禋庶歆濬酌之誠遄降飈馳

之助致令士心益固賊氣自摧冬月未終傾穴
巢而盡掃春風纔動振鼓吹而言旋

又丹兵祈禳帝釋道場文

除人之害雖佛亦容頑戎加殘物之凶無若今
之尤甚釋帝有降魔之力移諸此也非難且蠱
衰叫之聲仰聒至明之聽伏念某等庸虛忝位
輔相無能屢遭氐毳之侵陵旣難制禦雖有金
湯之險固尚且兢危由此遷僻地之榛荒自我
失神州之綺麗歷世都邑一朝丘墟猶不爲之
恥焉益欲避其難耳何醜徒之踵至遍外境以

橫行京師若一身也雖幸免於毒牙郡縣乃四
支也無奈委於饒吻未聞皮剥而毛之能傳豈
有胥亡而齒得不寒如予三事之臣終不可安
然忍視捨我六天之主又於何訴此危慘斯扣
靈床寔張覺席仰綿臺而歌詠聖彌縉貝牒而
讀宣秘文茲一七日之熏功儻格他鑒彼百千
帳之穢種即爲我擒伏願仗大神通添新氣力
列郡併力掃羣虜之羶腥疲民息肩致庶邦之
寧靜

爲晉康公重修順天寺慶讚華嚴章疏

法席疏

我佛申右手而作一寺舊範猶存祖師依菊行
而演十玄羣疑自落苟勤弘暢即格感通有古
精藍閱年幾紀山鍾秀異本國家奉福之場地
接清幽宜龍象栖真之所然屋宇甚庳而未合
壯觀抑攘掾漸古而已不堪支如吾官重而祿
豐忍不爲創雖至歲歉而日圯其誰有修載加
上木之功更賁變輪之美重檐鱗疊高棟翬飛
至若幢幡鍾磬之莊嚴與夫丹雘漆髹之彩飾
種種皆具一一可觀及當畢務之初將舉落成

之典高張猊座廣集鵬耆尅五十日之法筵談
八九會之玄旨微言袞袞如巨壑之傾波曠解
迢迢若高山之炤日音聲作供真實是香苟毫
許之營爲得瞽頃之感契伏願 聖上陛下嚮箕
疇之五福坐擁太平等竺室之萬籌茂延遐壽
五兵火戢四海波恬

同前寺藥師如來點眼疏

歷苑伽沙而有界淨若瑠璃噫藥師佛之放光
過於日月冥心即契非色可求然凡眼例須於
寓形況本經又說以造像如能捨金銀而用歸

不猶愈指瓜之戲成伏念某謬荷聖知叨司國
柄願沐恩於頂踵良不可任苟有補於髮毫庶
幾自効創茲北麓之古寺邀以東方之暉容釐
露檀誠點開蓮眼八十種之真相舉目想觀十
二願之洪慈轉頭斯應伏願 聖上陛下德與
五帝而六業擁無疆嶽呼萬歲者三壽延難老
三邊卧鼓四海迓衡

崔相國攘丹兵盡觀音點眼疏

晉康公元嗣也

此下十九首皆相國所請代作

聖智難思衆生所倚若以千手千眼之方便權

示梵威雖云萬馬萬步之精強即爲我虜嗟彼
戎羯擾吾封疆流腥臭之淫夷者自北自東被
毒牙之吞噬者無老無幼原其迹素縱天資虐
戾之使然省厥因由亦國政陵夷之所自宜其
懺悔弭此禍殃若弟子者處論思之司無守禦
之計捨幣禱神分神莫顯應泣血號天予天若
不聞勢已垂窮計將安出謹案大悲陀羅尼神
呪經云若患難之方起有怨敵之來侵疾疫流
行鬼魔耗亂當造大悲之像悉傾至敬之心幢
蓋莊嚴香花供養則舉彼敵而自伏致諸難之

不刊集卷一
六
顧消奉此遺言如承親囑茲倩丹青之手用摹
水月之容吁哉繪事之工肖我白衣之相罄披
霞翬仰點蓮眸伏願遄借丕麻仍加妙力如至
仁廣大憚令醜類以盡劉以無畏神通俾反舊
巢而自却

同前願請說禪文

明鏡誠懸應形皆現洪鐘虛受有扣斯鳴敢奉
忱詞覬垂曠聽切以迦葉微笑傳密印於靈山
達磨默求耀祖燈於震旦或正脉之相續或橫
枝之苟分其爲旨也不立文字而直趣真源其

爲宗也不踐階梯而徑登覺地得之在我悟不
由他苟除一念之妄緣即見自家之本分比如
雲糊天而月暗雲去則月明風動水而波生風
息而波靜然不有指南之達識曷易窮向上之
玄宗恭惟某禪師丈下當來金色如來現世肉
身菩薩真心虛靜元無一物之礙膺道貌孤高
不待五峯之秀骨允合人天之傾慕豈惟徒衆
之叅承遊方無去住之機浮雲其迹也傳法任
淺深之器甘露以充之伏念某端遇昌期早叨
華秩顧此丘山之荷一日難忘作何塵露之緣

萬分有補惟此頓門之藏實爲正法之原由是有奉崇之心慨然懷興復之志凡營佛事必演禪論敢特峙於猊床請暫揮於犀柄伏望俯循哀懇一振微音俾虜群而遁逃措國步於帖泰實弟子之願也

同前願神衆法席一七日疏

佛應如朗月之在天炤通世界神威若大山之壓卵摧伏魔軍彼契丹之民本獯豸之種叛離厥國翻如失穴之窟侵突我邦奈作磨牙之虎因釋憾而來犯隣疆者古或有矣其無故而公

行他境者吾未聞之或殘其州落而鞠爲丘墟
或焚其寺宇而化爲煨燼所營罪惡當速就於
顯誅何久稽延猶未悛於穢行幽明共怒中外
同憂其以凡庸之才揔文虎之任旣未能借筋
君前而助陳方略又未得請纓闕下而羈致酋
豪不唯泚頽而忸怩亦且鼓心而歎息願投楚
蔭仰借靈庥陳檀席於私廬集桑門之上士精
勤亦至懺悔良多伏願借八部之威助三軍之
氣俾虜敵腥羶之類滅蜂毒以殲夷及國民附
涂之徒變鴟音而服順

同前禪會請說禪文

佛是心心即是佛斯爲無上之宗人弘道道非
弘人須藉指南之辯自忘輕觸貪沐餘滋恭惟
某禪師文下雪竇前身曹溪老手閑雲出岫涉
浮世以來遊明鏡無塵照靈臺之本淨學者擬
高山仰止教焉如時雨化之不惟慧解之疏通
搜探道奧抑亦口音之洪暢悅可人心凡聞祝
舌之談如聽瑠喉之說伏念弟子本無遠識叨
據重權上不能以變理陰陽下不能以拊循民
庶羣情涵涵衆誦嗷嗷強隣頑獷之人徃來絡

繹列曜著明之象陵守連仍未知朕兆之何如
深軫憂勞之同極惟是心法足却兵災宜拜叩
於法王請弘揚於佛海伏惟云云廓迥大度無
拒哀祈弄微音於無孔笛中彈雅曲於勿絃琴
上快宣秘蘊大豁羣心

禪會請說禪文

佛印西來禪乘東轉雖心心相照自然絕語離
言若祖祖不宣誰肯上堂舉話仰祈宗匠略啓
玄源恭惟禪師丈下法器泓深家風清淡道存
乎默未曾鼓動於機關時或有言無奈震驚於

卷之三
天地伏念弟子才非輪翮職摠璣衡欲維持世
季之陵夷常耗竭愚心而計較唯梵力是荷必
延松麓之靈基顧法門雖多確倚曹溪之正眼
況今上天之變異也無言喻意頑敵之往來也
如疾在心益憑向上之宗期杜未然之患盛張
香範大集衲僧如予微願之必圓都在洪音之
一下伏望勿惜一搥之伎倆極談五葉之根源
普潤羣倫一如新望

同前請說禪文

宗乘密旨雖離說而寂空祖海深源必待人而

弘暢敢敷危懇請下微音恭惟某禪師丈下天
資䟽通道韻澄朗望高當世想瞻天上之景星
化潤羣生出作人間之時雨某以妄庸之品都
宰輔之司冒寵叨榮心如臨谷念時憂國脇不
沾床尚乏廟謀圖寧國體唯託南宗無上之法
期臻東戶大平之時爰罄三依行聞一話伏望
曲紆大度俯循哀祈廓宣衮衮之談豁破懸懸
之望

廣明寺禪會設齋請說禪文

心珠密授雖曰無言可言祖月猶圓不妨將指

而指恭惟泐潭的嗣荷澤高風雪鶴清癯動暖
聞天之響金毛奮迅輒嗥震地之聲今國家敬
眼藏之真乘啟譚筵於梵宇顧如愚輩素嚮宗
風斯營一日之緣庶有萬分之補仰干碧眼乞
指玄源伏望母拒誠祈高升寶座振大音而如
鐘斯吼暢一滴而如海斯傾掃胡虜之窺窬致
干戈之韜戢則是國之幸民之福愚之望也

廣濟寺安宅法席疏

瞿曇氏廣演之衆經孰非四辯離車子請聞之
妙說能鎮八神苟以十善齋戒而奉持有何一

切土地之聖導

出於本經

緬惟聖祖崇此法門採道

誦之秘言開廣濟之精宇俾揚寶藏永作恒規

迨後世而弛心反先王之發意佛慈尚可天鑒

何如伏念弟子本乏奇籌但憑慧蔭顧嘗致丹

兵之易熄亦莫非梵力之所加今者星宿之行

屢變於乾象陰陽之忌垂通於甲午庚辰仁祿

逆防災漸因締平生之至願俾揚上符之真乘

雖踐舊儀痛傾深懇自今日敬止已後囑有司

行之益精伏願借善濟之私杜未萌之患蔑四

時五行之禁忌百福是道致六府三事之和修

九功惟叙戎羗遠遁宗社寢寧

龍寶院新創慶讚疏

興大利不必舊規貴能適變理古寺猶得梵福
况迺創新眷上都之通畿有南壤之要會其距
民居也最屬故爲賊種之常栖凡馬馱人負之
所輸皆國用家資之攸仰脩經山水邈自遠來
垂蹈京師反爲他有非惟物之見掠甚則人亦
被戕聞之大嗟思所可救宜開僧院使不絕於
人煙鎮作福場亦得依於佛蔭與善知識發大
願悰旣崇鱗屋而處以釋流申納膏田而充其

歲費麗之聚落徧厥使令功皆出於私營力不借
於官辦方其已事將以落成謂精覈盧舍那之
淨根只莫如李長者之英論先此會而雖已繙
於九件本所期者欲連講於十番所邀皆南地
之名僧數盈一百以此演圓通之正法利洽大
千繫茲勝因格彼明鑒伏願邦基之鼎聖筭後
天公私殷阜而路不拾遺中外寧謐而民未識
戰

普濟寺行五百聖殿祈雨文

天機萬變旱乾由譴罰而生聖力一迴雲雨乃

須臾之頃自仲春而至夏致亢陽之爲災日流
金而甚於火爍苗仆塊而如以湯焦若今日之
間莫致九霄之澤即甫田之上便無一畝之收
人所死生勢在朝夕如有罪者蒙之尚可於無
辜也及則奈何是皆由宰相之積愆其忍啜膳
羞而安坐禱神明而靡吝出囚繫而無功計雖
已窮心復自忖不若投大雲之蔭於以乞甘澍
之霑捨百人半月之糧特營信施用一鉢數升
之例各展香羞庶以我之膏粱撥作民之膚肉
至誠所格妙鑒必通伏願霈一日之澍沱滋濡

赤地致九農之豐稔救活蒼生

興天寺法會疏

十有妙旨日先炤於高山四事熏功津輒流於
甘蔗念社稷民安寧之本關佛法僧護攝之慈
矧茲三聖之靈編實是一乘之圓教演揚無數
霑潤叵涯故自椒闥肇迴於願轂倅投蘭若方
展於覺場凡諸檀越之營齋揔爲縣官而奉福
若弟子叨國相者旣久荷主恩之亦多所之非
財發乎心則便辦孰居斯地見其義而不爲爰
捨家貲悉嚴梵供披文句之奧蘊際理事之交

李本庵集四十一
融所締勝因即通他鑒伏願邦君享太平之慶
國母膺難老之休珠躔順常莫現蒼天之譴告
膏澤應候遍滋赤地之曠乾

甲午年談禪日齋疏

昔達磨得師子比丘之默傳耀佛燈於中土我
藝祖因如哲大士之密詮輒禪軌於三韓有國
綿遠而式克至今以予忖度則靡不由此洪延
後代益暢真風某乘國家版蕩之時據宰相論
思之地隣敵之偵謀不絕乾文之變異滋彰顧
無廟筭之堪施唯倚宗乘而爲固在平日願爲

弟子尚欲扶祖月之重輪况官家敬此譚筵得
不措功山之一簣肆傾私帑寔薦熏科彼九山
濟濟之初流皆五葉承承之的嗣交騰槌捧互
辨風幡熏然四事之儀格彼多天之鑒伏願皇
圖鞏固國步寧康內無動草之驚外蔑飛塵之
警

王輪寺神衆法席日齋疏

佛智莊嚴彌滿虛空而無尋神行奮迅動搖山
岳以非難念彼丹民生從白狄本惟不義之俗
穢惡甚於諸戎今舉無名之兵橫行入于我境

或侵陵州落而以此爲樂或焚敗寺宇而略無
所疑以犬羊而著冠類狼虎之擇肉無老稚而
皆殺自開闢以未聞其罪則天地所不容其惡
則幽明所共怒何就誅之誓緩而曠日以侵淫
是天所然豈人爲也某適此家邦之多難叨干
祿位之過豐欲手執干戈顧無拳勇之敵衆但
坐安床褥將何面目以見人夙夜憂勞俯仰慙愧
今國家行蒙梵力坐服凶胡召高士於名山啟
法筵於福地念衆真之威號嚴四事之熏科勤
亦至焉施不細矣見此無遮之勝會誰無隨喜

之善心況弟子早罄至誠痛自依於佛蔭今聞
能事盍助築於功山悉倒私貲式嚴淨範區區
之懇一一而詳伏願仗神天之威增士卒之氣
軍聲益震若擊電之殷高山虜種自消如片蓬
之入大火凡害于國寧了我躬

昌福寺冬安居楞嚴法席疏

廣長舌一音之說皆出演真光明頂萬行之門
獨稱了義心苟敬止福可涯哉伏念某謬居鈞
軸之司亮乏絲毫之補但憑梵力圖笑邦基凡
禮精修之祐流有如親炙於佛面當游學四方

則任尔一筇之浪迹及閱過三冬則不妨丈室
之安身故於京輦之精廬處以山門之開士幸
可人之皆集宜何法之堪揚唯是妙蓮花與實
發紫金聚者微言甫釋本覺自明擬受如來伸
臂之摩立袪演若迷頭之怖斥緣才集覺應匪
遙伏願災沴頓消吉祥荐至聖筭後天而益久
民居按堵而無虞

占察會疏

彼焉此焉衆生著輪迴之聚九者八者苦薩開
津濟之門苟能精祈誰不利涉伏念其崇真有

素拯溺爲先公未忘三界之迷倫尚淹苦海私
亦念六親之近屬或滯重泉擬種善根小營冥
福投蕭寺側金之地譁真公擲簡之儀梵唱雷
宏眞香雲布牛雖賤畜而猶或垂渡人本靈物
而得不迴心伏願先亡父母六親等遙沐清冷
頓離熱惱過一子地自成正覺之身升九品臺
親覩如來之相及毛道隨風之類到金繩作界
之鄉

仁王及金經法席疏

金鼓中理懺事懺之音最爲微妙寶蓮上人空

法空之說亘可言思十音所揚千界同震其以
葢爾之質據巍然之司頃遭丹寇之屢侵憤莫
如此雖集人謀而博議計無奈何謂一憑梵力
之神通即萬倍強兵之猛銳況經王是救世之
良藥而佛母乃護國之勝門盍暢真源坐消醜
種故致誠而歸仿期趁歲以演宣今茲戎虜之
逼還盍示神通之所及其爲信奉顧與舊以彌
加凡所設施宜以精而不苟悉傾私帑大啟熏
達執玉軸者指千旣盈乎百座禮金身則心一
已格於六天伏願災沴不生禎祥沓至夷狄絕

竊窺之望形滅影消邦家膺悠久之基根深蒂固

請說禪文

祖師證傳心印不嫌口印之無開衆生熏練性
根必自耳根之先受敢披霞纓佇聽玉音恭惟
某師丈下逸翮橫天脩鱗透網大弔希用雖機
括之暫收老手猶存遇標的則輒發矧國步方
艱之會是法王痛救之時伏望許據高床略開
秘藏當門劒下截斷未兆之災無孔笛中吹出
太平之曲

捨子削髮齋疏

三身應供亘人天所共歸依四姓出家由父母
先割慈愛盡弘願海同種善根伏念某偶落因
緣一從婚宦雖自少傾翹於內教固無路洒掃
於梵門徒思出世之方莫識息機之漸身既爲
冠帶之束若此勞生子則是骨肉所分可令代
已捨予愛息就彼戒壇鬚逐剪刀而煙雲空肩
披新衲而山水出一叅弟子永誓多生仍張四
事之熏科姑露一心之精懇伏願仁風廣扇慧
蔭旁加邦基如山固而不搖正業若瓜綿而可
久次願先亡父母親受大悲之別出六聚輪得

成正覺之身遊一真界凡沉苦海共倚慈航

靈通寺修補大藏披覽疏

一音演法開衆妙之門萬軸盈函踰最大之寶
由其創本之不易示於補廢也可嘉伏念云云
夙託真庥庶裨王化凡佛事有可得辦期吾生
無所不爲彼坎地之伽藍有竺經之俱舍邈矣
歲季之寢遠惜乎部秩之多遺紛綸焉若雲之
分散頓焉如絲之亂自聞斯事嘗語於心天之
虧有鍊石可補之因日之側有揮戈可迴之理
矧茲身力之所及何惜功勤而不營尋發露於

精虔悉緝修於逸漏韜珠更映缺月望盈方能
事之甫周邀悟流而是閱千指繙轉六種震驚
伏願聖德增暉播四方之歌詠皇綏更紐無一
事之闕遺下至羣生安如再活

歸正寺住持行圓覺法會疏

說法泐機皆出瞿曇之妙諦迴光見性莫如圓
覺之勝門伏念假浮屠之形逋齊民之賦無功
無德何以利吾國家不耕不耨甚矣賊夫糧食
念東海三韓之有國自西漢五鳳之立元寢及
大祖統壹以還合爲千百餘載常與北狄戰爭

相殺死者幾億萬今若丁亥戊子之尋戈與庚戌癸巳之寇境載冊如昨使人寒心况近者逖彼戎胡入吾封域彼俗之見斃者峙如京觀我民之被戎者積若亂麻此皆宿劫之冤銜恒轉多生而酬酢邊境之版蕩由此而生邦家之繹騷自茲而作不有因緣之解釋其爲封執也何窮雖吾無賴之徒不忍坐觀其事有如叅政相國崔公一國之安危攸繫萬人之倚注所歸公寧則十國皆寧公壽則萬人皆壽宜託有爲之報仰祈難老之休是用拈佛日而齋盥轉願輪

之莫大即於精舍展此熏筵廓宣空寂之詮覲
荷慈悲之援伏願我 聖上陛下賴多天之保
護爲世充長擁列城之輯寧與民同慶伏願叅
政相國崔公作時元鼎爲國大山鎮世安民享
郭汾陽之富貴延年益算持衛虎公之康強次
願代代戰亡負將士卒等永釋宿舍反觀本覺
拋報身於毛道覩梵相於蓮臺

東國李相國全集卷第四十一

李相國集跋尾

嗣孫益培言祖文順公全集四十一卷後集
十二卷年譜一軸行于世者尚矣多有訛
舛脫漏之處今者分司都鹽雕海藏告畢
之暇奉

勅鏤板予幸守比郡以家藏一本讐校流
通耳

辛亥歲高麗國分司大藏都鹽

奉勅雕造

校勘河東郡監務管句學事將仕郎良臣李益培

錄事將仕郎軍器注簿同正張世候

錄事將仕郎軍器注簿同正并洪湜

副使晉州牧副使兵馬幹轄試尚書工部侍郎全光宰

使





集國相李

十三